

REGIONAL NEWS

HEADLINES:-

1. Village Council leh Local Council electoral roll chu tun thla ni 8 (Nilaini) hian tihchhuah a ni dawn.
2. 'Ruatfela Nu' ti a hriat lar Pi Vanramchhuangi chuan kutdawh khapna dan siam thuai a tul a tih thu a sawi.
3. Prime Minister Narendra Modi-a'n Delhi khawpuia hmasawanna hna hrang hrang, cheng vbch 12,200 chuang hu thawhna tur lung a phum.
4. China rama HMP virus leng mek chu uluk taka vil reng a ni tih Union Health Ministry-in a sawi.

<><><>

VC/LC POLLS

Thla leh ni 19-a village council leh local council term tawp hma a inthlang thei tura inbuatsaihna-ah VC leh LC electoral roll chu tun thla ni 8 (Nilaini) hian tihchhuah a ni dawn.

State Election Commission hotute hnen atanga thu dawn danin VC leh LC inthlang thei tur hian sorkarin an hun pawh tawi a puan hma atang tawh khan electoral roll hi buatsaih chhoh a ni tawh a. Tunah hian a hmawr bawk tep tawhin Nilaini khian inthlanna atana hman theih turin tihchhuah (final publication) a ni dawn a ni. Electoral roll peihfel a nih hnu hian VC leh LC inthlan hi puan thuai a nih rin a ni a. VC inthlanah hian autonomous district council huam chunganga VC-te tel lovin Mizoram pumah inthlan buatsaih a ni dawn a. VC leh LC inthlan inbuatsaih dan leh an inpuahchah tawh chin chungchangah state election commission chuan district tin bawrhsapte biakhmuhtheih hmangin a lo sawipui tawh bawk a ni.

Puan tawh thin angin tun VC hun hi kumin August thla chawhnu thleng a nih lai-in sorkar chuan a pawh tawisak a, February ni 19 a an hun hi tawp turin November ni 20 khan local administration department (LAD chuan hriattirna a chhuah a. Thla 6 zeta VC hun pawh tawi hi eptu party-te leh The All Mizoram Village Council Association (AMVCA) chuan an dodal a, AMVCA phei chuan Gauhati High Court-ah khinna an thehlut a ni.

Tun hnai a VC thar siamte tiam lovin kum 2020 a VC inthlanah khan VC 533 a awm a, tunah chuan siam tharte nen a vai a inthlan buatsaih a ni dawn a. LC hun kal mek pawh tawi chungchang hriattirna hi thla hlui mai khan UD&PA department chuan a tichhuak ve leh a ni.

<><><>

FIRST SUNDAY

Vawiin, kumina Pathianni hmasa ber chu Mizoram Presbyterian Kohhran chuan kumin chung atana hming sande sikul hming ziahna hun leh pawl siamremna ni atan an hmang.

Naupang Sande Sikul (NPSS) department tinah chuan pawl sawn, pawl siamrem leh hming ziahluhna ni atan an hmang bawk a. Chawlhni leh atan hian pawl tinah zirlai lam hawiin hun an hmang tawh dawn a ni. Kumin chung hian puitling department-ah zirlai atan Rev. Dr. L.H.

Rawse-a ziah 'Thuthlung Thar Zirtirna' tih zir a ni dawn a. Presbyterian Kohhran Puitling Sunday School zirlaibu hi Mizo tawnga ziah lehkhabu malkhai-ah chuan copy chhut chhuah tam ber a ni thin a. Kumin atan hian copy 95,000 zet chhut a ni.

Hetih lai hian Salvation Army chuan Pathianni hmasa ber hi 'Chhungkaw pual inkhawm' (Family Sunday) ni-ah hmangin, vawiin chawhma inkhawmah khan corps leh society hrang hrang an hmang a. Salvation Army te hian kumtinin Chhungkaw pual inkhawm hi Pathianni hmasa berah an hmang thin a, he ni pual hian hun bik siamin an hmang a. Pathian thuchah sawitute'n chhungkaw pawimawhna chungchang an sawi tlangpui a, chhungkua a Pathian fakna hla sa leh Pathian thu chhiar rual turte an inruat bawk a, hun hlimawm tak an hmang a ni.

The Salvation Army te hian vawiina Chhungkaw Ni an hman bakah hian, Thawhlehi lo awm tur zanah Chhungkaw Zan an hmang leh dawn bawk a, in tinah zan dar 8 ah chhungtin ten inkhawm buatsaihin, kumina an thupui 'Krista ang tura Tihdanglam' tih hmangin chung inkhawm an buatsaih leh dawn a ni.

Baptist Kohhran chuan kum 2025 Pathianni hmasa ber chu Inhlantarna hun atan an hmang a. Tualchung Kohhran hrang hrang te'n Inhlantarna hun hi anmahni kohhran mila siamin inkhawm hruaitu in thuchah a sawi nghal a. Thupui awmsa hmangin an tawngtairual a, kohhran Secy report te ngaihthlak niin zaipawl leh malzaite ngaihthlak a ni. Missionary Day, January ni 11-ah ruai nen lawm leh turin an inpuahchah a, Kohhran ho zaikhawm pawh chhonzawm zelin January ni 13 thleng zaikhawm turin programme duan lawk a ni. UPC (NEI) kohhran chuan tualchung kohhran remchan dan angin, vawiin Pathianni hi kumthar lawmna anga hmang an la awm laiin, Sunde Sikul pawl siamrem leh hming ziahlhna ni atana hmang an awm bawk a. Bial thenkhatah chuan rawngbawltu ruat tharte Pathian hnena hlanna hun an hmang a ni.

<><><>

BEGGARS

Khawtlang tana thawktu, 'Ruafela Nu' ti a hriat lar Pi Vanramchhuangi chuan kutdawh khapna dan siam thuai a tul a tih thu a sawi.

Mizoram, a bikin Aizawl khawpui a kutdawh tam tak hi Bangladesh atanga dan kalha lo lut Chakma mite an ni a an hriat thu a sawi a. Hei hi dan siam a khap a tul a tih thu Pi Vanramchhuangi chuan Akashvani Aizawl a hrilh a. Tun sorkar dinglai, a bik takin chief minister Pu Lalduhoma lakah beiseina sang tak an neih thu a sawi bawk a ni. Pi Vanramchhuangi chuan kutdawh chungchang an bawhzuina-ah social welfare department chuan 'The Mizoram Beggary (Prevention & Prohibition) Bill, 2008 an duang a. Law & Judicial department pawmpui (vet) tura thawn a ni a, Law & judicial department chuan Mizoramah kutdawh an awm lo tiin an lo hnawl ni-in a sawi a. Hemi hnu hian kum 2009 khan Human Rights & Law Network pawl chuan Aizawl, Lunglei leh Kolasib district a kutdawhte chanchin zir chian hna an thawk zui ni a sawiin he an zir chianna 'baseline survey of beggars' report hi sorkarah thehluh mah se awmzia a ni zui ta lo niin a sawi. YMA leh Presbyterian kohhran pawhin Mizoram hi kutdawh awm lohna state a siam chu an

duh dan a nih thu an inkhawmpui thurelah telha an pawm tawh chungin dan siam theitu sorkar an la ko eih thei lo niin a sawi bawk.

Pi Vanramchhuangi chuan Mizo khawtlangah kutdawh awm lo anga ngaih a nih lai-in Bangladesh atanga dan kalha lo lut, a bikin Chakma kutdawh an tam thu a sawi a. Hei hi titawp tur chuan dan khauh tak siam a ngai a ni a ti. Aizawl khaw lai a kutdawh an thih chuan hnam leh kohhran mualphona a nih theih thu a sawi a. Kutdawh khapna dan khauh tak siam thuai a tul a ni, a ti.

<><><>

MEAT PROCESSING PLANT

Bungbangla, Zemabawka Pork & Poultry Processing Plant chu tangkai taka hman theih turin buatsaih mek a nih thu MIFCO chairman chuan a sawi.

MIFCO Chairman Pu Lalthazuala Rawite chuan nimin khan sa sawngbawl na tur hmun buatsaih mek hi a hmunah tlawhin, tun atanga hun rei loteah Arsa leh Vawksa sawngbawl na hmun hi hman theihin peih a ni dawn a, mipuiten sa thianghlim ei tur an nei thuai dawn a ni, a ti. Pu Lalthazuala Rawite chuan, kum 2008 khan he hmun hi hman theih turin hawn a lo ni tawh a, sawrkar hmasate khan eng harsatna nge an neih a hriatpui lova amaherawhchu vawiin thlengin an la hmang lo, a ni a ti a. Pu Lalthanzuala chuan tun sawrkar chuan tangkai taka hman an tum thu leh tunah hian a building leh khawl chhe lai te siam thain thawmthat ngaite thawmthat mek a ni a, rei loteah peihfel a nih tur thu a sawi a. Tunah rih chuan vawksa sawngbawl a ni phawt ang a, arsa leh bawngsate pawh hmalak theihna awm ang ang dap chhoh zel tum a ni ati.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

PM INAUGURATES

Prime Minister Narendra Modi-a'n vawiin khan cheng vbch 12,200 chuang hu, hmasawna hna hrang hrang thawhna tur lung, Delhi-ah a phum a, cheng vbch 4,600 vel seng a Sahibabad leh New Ashok Nagar inkara Km. 13-a thui, Delhi-Ghaziabad-Meerut Namo Bharat rel kawng phah thar a hawng bawk.

Pu Modi-a hian cheng vbch 1,200 vel senga Janakpuri leh Krishna Park inkar Km 2 leh meter 8-a sei, metro rel kawng a hawng bawk a, he kawng hi Vikaspuri, Janakpuri leh Delhi thlang lam veng-te tan a tangkai hle dawn a ni.

<><><>

WATCH ON HMP VIRUS

Union Health Ministry chuan China rama Influenza ang natna, Human Meta Pneumo Virus (HMPV) leng mek chu uluk takin a vil reng tih a sawi a, ICMR-in HMPV kai nia rinhlehthe endikna tur laboratory siam belhin kum tluanin hri leng hi vil reng a ni ang, a ti bawk.

China rama HMP hri leng mek chungchangah Health Ministry hian New Delhi-ah Joint Monitoring Group thutkhawm a kova, Health Services Director General, Dr. Atul Goel-a chuan tun dinhmunah mipui tan lo thlabarna tur a awm lo tih sawiin tih dan thin pangngaia inveng fimkhur turin a chah a ni.

HMP virus hi India tiamin khawvel pumah a darh mek tih Jt. Monitoring Group thutkhawmnaah hian tarlangin, hri kaite chu hritlang, khawsik, khuh, hnar ping leh thawk lamah harsatna an nei thei a, ICMR leh IDSP-ten uluk takin thil awmdan vil rengin hetiang anga na hi tunhnaiah an pung thar lo tih an sawi a ni.

<><><>